

書名 空同先生集六十三卷 嘉靖九年序刊本  
撰者 明 李夢陽 撰  
卷 卷七  
內容分類 集-別集-明中葉  
索書號 倉石:40084  
編號 4008000



# 卷七

空同先生集卷第一

賦一十首

疑賦

思賦

省愆賦

緒寓賦

俟軒子賦

一十首

疑賦

乾  
坤高卑易矣。星辰在下。江河逆矣。天喬喬天

北郡李夢陽撰



[彩色首頁1](#)

[東洋文化研究所漢籍目錄 編號: 4008000](#)

[東洋文化研究所漢籍目錄所藏漢籍善本全文影像資料庫 索書號: 倉石:40084](#)

[漢籍善本全文影像資料庫文本空同先生集六十三卷 嘉靖九年序刊本](#)

[版權所有: 東京大學 東洋文化研究所](#)

[使用上的注意事項](#)

黃河雖大川所嗟源不清千里能一曲不如直道行  
王允輔京室李杜垂其名介休巾角折乃為時所傾

析薪二首

析薪如之何爰以析其理結交如之何相要在終始  
女蘿施松柏女蘿千尺長結交不知心結交安得常

二

列曜垂四隅燦燦冒中土箕星乃好風畢宿復吹雨  
汎觀愚哲士戚戚各有營哲夫計千載愚者終一生

空同先生集卷第六

空同先生集卷第七

北郡李夢陽撰

詩 樂府三十四首

雜調曲

公無渡河二首

空城雀

野田黃雀行

石城樂

大堤曲

襄陽謠

白銅鞮

襄樊樂

襄陽浣婦行

鴈門太守行

渡河篇

黃鵠篇

煌煌京洛行為曹縣王子賦

南山篇

仙人好樓居三首

白馬篇

將歸篇

答客

擬燕歌行二首

芳樹二首為上海陸氏賦

鳴鴈行

知足吟

直如絃

采菇曲二首

雙燕篇

古別離送龍湫子

史烈女

孤鵠篇壽程生大母

雜調曲

公無渡河二首

盤螭作川梁功奇勢難久魴鱗尾徒跽天吳戴九首

公無渡河河深不可渡中有白石齒齒嶄嶄兮峩峩  
蛟龍九頭戴角崢嶸峯磕兮水鱗鱗兮衝素波公無  
渡河吹沙暮多風河伯築梁結兩螭汝無羽翼墮水  
中涉水雖可樂不如登山阿噫嗟嗟公無渡河

空城雀

雙雀下空城穀穗黃離離二雀跳跟鼓翼啄穀穗其  
朋千百咸來集小者啾啾是其兒誰者翁嫗被髮曳  
鞵來打雀雀薨薨飛上城嘈嘈鳴兩人恰欲抽身雀  
便復集回頭罵雀辛苦長得禾汝忍飽之我無粒手  
中之利彈又茂網羅天旋日昏柰爾雀何

野田黃雀行

樂樂其所自生禽獸過其故丘悲鳴黃雀游野田焉  
得鴻鵠高舉情鳳凰靡世見生長丹山依玉禾白於  
脂飽之忽來飛仲尼逢子西乃被接輿譏

石城樂

盈盈窈窕女當門是誰家十三學畫眉十五擅琵琶  
邑中有盧家此女名莫愁向前問此女女聞雙淚流  
二十嫁夫郎重門阿閣房臨窓種桐樹五年妾身長  
自渠下揚州置妾守空樓悔不快剪刀斷水不東流

大堤曲

漢水白離離月落山黑時堤頭石不平走馬誰家兒  
儂住襄門西而在漢水北浮橋不着纜郎詎得儂識  
大船何處來落帆向儂許高鞞白恰子識是真州估

襄陽諷

一灘高一尺十灘高一丈湍急石巉魚何由上棹戕  
櫓折俾我心愴順風沿水舉帆千里

白銅鞮

誰家池高陽池日暮歸倒接離醉如泥汝爲誰拍手  
歌襄陽兒

襄樊樂

立檣如麻卿來誰家新燕營巢風中滾沙鷓鴣逐鴛  
鴦金井石榴黃珍寶丘山積檀名黑門廂

襄陽浣婦行

彼誰者姬吾家浣衣新寡寒賤髮髮霜飛體無完衣  
十日九飢態度則殊辯是知非姬泣荅言妾襄宮女  
少小入宮荷主憐顧四十始出嫁爲民婦灌田采薪  
奄就貧窶舞裳綻汚形容改故夫死男孺藜藿靡救  
姬咽復言侍襄定獻幾三十年王有義辭皇嘉特宣  
父子俱覲妃嬪如煙鈿第載路龍旂飄翩御使絡繹  
珍車班班漢峴同清天歌播焉袞舄南還層城言言  
烏春日妍桂宮有延傑臣觴壽玉娥奉筵王旣捐世  
變來罔度聞見駭異古殿寂寞姬勿更言萬類咸爾  
厥亦天道安之則已

鴈門太守行

鴈門太守汝何人治邦三月稱明神我有牛羊賊不  
來掠我有禾黍人不敢割昔我無衣今有袴著我思  
禮拜太守太守不見憐但聞太守身姓邊紫髯廣額  
聳兩顴太守出門四牡駉駉後擁皂蓋前導兩麾行  
者盡辟易居者不敢窺旁問太守胡所之云訪城南  
皇甫規

渡河篇

小麥黃黃河波君柰何今渡河昔君游此思君一見  
經旬累月不君一面君今渡河乃往何縣跋予望之  
淚下如霰汀有鳧兮泚有蘭枝相亞兮居不單人生

心事豈有殫君慎動靜加君餐

黃鵠篇

黃鵠游四海倦言還故邦中路失其雌三年廼有雙  
鴛鴦毛羽縵哉工凰儔鶴匹渠豈同嫵婉懽娛殺酒  
豐琴鳴瑟奏芳夜中樂極思來內忡忡驗新追故悲  
悔叢人生萬事慎勿輕易狸鼠之能詎逮騏驎車牽  
美期谷風興刺我心自知聿斯語誰

煌煌京洛行爲曹縣王子賦

時風布陽和鞞鞞華春木清朝富才賢藹藹冠蓋屬  
努力競高路雞鳴起相逐白日耀飛轡流雲翼行轂  
同里多彙薦一門有聯躅蹶彼曹南士雙雙皎如玉  
聚鳴各當晨連翮一向急煌煌京洛內濟濟英妙集  
二郎紳委蛇三四錦翕熠大郎雖未官府身拾班級  
入室談仁義出與卿相揖聲名旣烜赫性行復剛執  
見者勿徒羨青雲貴自立

南山篇

南山何巖巖上有孤鸞凰佳偶永相失日飛夜悲鳴  
遺腹生雛哺之良艱晨采竹實暮取琅玕吁嗟哺之  
良亦艱雛成被九采翱翔覽四海四海觀光儀阿母  
亦榮輝峩峩相公門屹與南山齊自有鸞凰來綽楔  
增崔嵬相逢且莫言聽我南山篇

仙人好樓居三首

律律海中洲峨峨白玉樓上曾結浮雲下戴神鰲遊  
前簷陰白榆青龍守門樞上有無始公餐霞煉金腴  
飛瓊鼓玄橐浮丘扇其隅情閑覽八表出入服氣輿  
日月跳兩珠廻旋但須臾萬年永福昌寤言莫相忘

二

謁帝華蓋側沐髮咸池旁巖巖雲中樓文杏裊爲梁  
黃金走闌干銀闕前相望聳身若輕翼登之窮四洋  
四洋北荒沕波瀾浩揚揚九州一何拘歛顏歸洞房  
屑玉煉精魄用神無何鄉萬年永福昌寤言莫相忘

三

乾鵲知來風靈人炳先幾超世構巍峩上與飛雲齊  
舉手拂天河白石寒離離牽牛不服箱織女棄支機  
孤鳥銜若華東來欲誰詒海水淺以清俯之嗟嘆咨  
眷茲勿輕道翩翩衆鳩馳萬年永福昌寤言莫相忘

白馬篇

白馬紫金羈揚鞭過市馳萬人皆辟易言是賣珠兒  
生長本倡門結交蒙主恩寢食玉榻側獨聆漫渥言  
取金大長秋徵歌李延年家住十重樓珠簾白玉鈎  
綺繡裁襦裳妖艷無匹儔片言即賜第意氣凌五侯

將歸篇

對面有乖絕千里長相思登高望來車入門賦將歸  
驚風何飄飄獸兔莽間啼羣鳥各有趨他鄉難獨依

獨依令人惑悠悠浮雲馳悠悠尚可道霜露墮百草

荅客

子去有何見來之奚所聞願客且寧坐爲子請敬陳  
丈夫志四方出門轍同輪人心投合諧匪必鄰里親  
長風會枯蓬飄飄逐飛塵旣東忽復西聿誰究其因  
引觴就岐路有懷庶能伸

擬燕歌行二首

花稀葉艷藤蕪芳皇皇溥原修且將陽浮野曠雲飛  
揚風沙眯目燠氣黃禽獸阻飢狐在梁興言送君還  
故鄉牽袂欲別立徬徨延視極騁中自傷締交心違  
隔肝腸爾去孰予共杯觴蘭橈桂柁文荔檣逝哉汗  
漫凌洪洋安能假翼東南翔何人贈君紫玉璫又何  
贈之雲錦裳永言嗣茲無我忘

二

銀河耿耿秋夜長牽牛織女限河梁終日弄杼不成  
章延頸北望涕沾裳自君別我之他方錦衾燦兮獨  
空林北風發發天雨霜鴻鵠垂翅不能翔豁谷天寒  
林樹蒼道路欲歸多虎狼人煙斷絕乏資糧爲君憂  
愁斷肝腸思策良馬逝君旁中道失路河無杭攬衣  
踟躕夜未央願爲浮雲歸故鄉

芳樹二首爲上海陸氏賦陸出東坡故硯姑  
蘇全肩筆索予面賦一字起十字止



嗟天運春奄暮翩翩者鳥集于芳樹芳樹生路隅車  
馬一何多朝看桃李華夕看桃李柯爰登高丘以望  
遙見長安綺樓樓中美人彈瑟如聞三嘆未休客乘  
白馬繫樓下秉燭置酒娛夜遊美人贈我錦繡辭把  
玩不異珊瑚鈎林陰溥露羅袂薄明月照闥那可留  
嗟乎人生何不共努力君不見城鴉哺子忽生翼

二 前缺八字句此篇足之

猗君子道爲貴貧夫所欽駟馬高蓋東家雖椎牛不  
如西家蓋雖有文馬千駟不如西山啜薇猗嗟富貴  
良何爲瞻彼青青兮陌上林穠華灼灼兮一何早涼  
風有時漂搖來吹汝坐見淒淒白露滿芳草願采青

松寄情親於遠道

鳴鴈行

鴻鵠高舉摩天飛渴飲沆瀣餐靈芝翅拂日月雲爲  
衣卽有矰繳安能施下遊滄海高河漢我思與爾時  
相見羽短毛長何足辯

知足吟

衡門可栖藜藿可飯錦綺雖麗韋布自暖車馬雖貴  
豈若仰偃下覽林臯上陟巒嶽靜倚垂虹憇目送行  
雲返

直如絃

直如絃死道邊相逢且勿誼敬聽古人言子雖抱良

壁暗投誰爲惜撥蜂尚見疑何況不相知種桑爲得  
衣種穀爲得飽結交不得心不如絕交早

采菇曲二首

衆星欲沒月模胡人家河上起相呼相呼相喚采秋  
菇問渠早起緣何事此草日出化作田中枯采菇采  
菇君早歸霜寒露重濕人衣藍田白玉非無種不似  
商山好蕨薇

二

白如白玉簪香如玉田禾行人且莫行聽我采菇歌  
儂家住在黃河曲一日波濤怨殺河河來有魚去有  
麥麥下秋霜菇菜多不求河向城南去只願年年河

不波

雙燕篇

雙燕來故室不見阿母語穿窓入幕尋阿母哀鳴欲  
棲還復舉喃喃止翠柝徘徊拂素幃浮塵積玉珈斷  
蘚生畫衣雙燕年年春社來阿母阿母何時歸

賦得古別離送龍湫子

盈盈楊白花沉沉綠波水化爲浮萍草乃與人相侶  
飄泊無根蒂隨風任流止今日歡聚客明日倏千里  
千里異鄉縣有時復相見心情豈固殊所嗟形色變  
一見復一別少壯頭盡雪老大未足傷願言崇令芳

史烈女

宋烈女者杞史氏之女也未嫁而死其夫是踰  
禮以守信破經而成仁者也李丰曰史氏女有  
激俗之功焉然予聞其言矣於是乎述

梨花如雪霜鴛鴦不成雙我心明如鏡我心清如水  
鏡明有塵時冰覆無收理古昔華山畿行人下馬拜  
春風兩蛺蝶綠草搖衣帶

孤鵠篇壽程生大母

有孤者鵠毛羽蒼靈氣勃勃吞秋霜飢餐玄圃禾渴  
飲瑤池漿朝從金母遊夕挾飛瓊翔生有二子二子  
生八雛雙雙崑崙之巔漱芳茹膏殮玉腴上下嬉紫  
虛青鳥爲伴文鳳俱俯視鵠鴉鷓鴣何啻萬萬輩

啾啾啄腥穢

空同先生集卷第七

詩集卷七

十一詩